



ZAPISNIK O RADU 63. SJEDNICE
KOLEGIJA GRADSKOG VIJEĆA GRADA SARAJEVA
ODRŽANE 12.11.2024. GODINE

Broj: 01-GV-02-1412/24
Sarajevo, 12.11.2024. godine

Prisutni:

1. Jasmin Ademović, predsjedavajući Gradskog vijeća
2. Mirela Džehverović, zamjenica predsjedavajućeg Gradskog vijeća
3. Srđan Simonović, zamjenik predsjedavajućeg Gradskog vijeća
4. Toni Vukadin, predsjedavajući Kluba gradskih vijećnika Naroda i Pravde
5. Alen Girt, zamjenik predsjedavajućeg Kluba gradskih vijećnika Naše stranke
6. Muamer Mekić, predsjedavajući Kluba gradskih vijećnika Socijaldemokratske partije BiH
7. Vedad Deljković, predsjedavajući Kluba gradskih vijećnika „Deljković-Simonović“
8. Samir Bejić, predsjedavajući Kluba gradskih vijećnika „Danijela Šahat-Samir Bejić“
9. Drago Jurić, zamjenik predsjedavajućeg Kluba gradskih vijećnika „USD-BOSS“
10. Enisa Spahić, predsjedavajuća Kluba gradskih vijećnica „Enisa Spahić-Amra Zulfikarpašić“
11. Seid Škaljić, predsjedavajući Kluba gradskih vijećnika „Seid Škaljić - Željko Majstorović“
12. Jasmin Skorupan, predsjedavajućeg Kluba gradskih vijećnika „Korora/Skorupan“
13. Vedran Dodik, predsjedavajući Kluba gradskih vijećnika „SMS-Savez za Stari Grad-Srđan Srdić“
14. Mila Eminović, sekretar Gradskog vijeća

Sjednici je prisustvovao Srđan Srdić, zamjenik predsjedavajućeg Kluba gradskih vijećnika „SMS-Savez za Stari Grad-Srđan Srdić“.

Sjednici je prisustvovao Samir Avdić, zamjenik gradonačelnice Grada Sarajeva.

Sjednici je prisustvovala, po ovlaštenju Gradonačelnice, Aida Bajramović, sekretarka organa uprave.

Sjednici su prisustvovala Mirjana Đanović Stanić, rukovodilac Stručne službe za poslove Gradskog vijeća Grada Sarajeva i Zinaida Beširević, šef Odjeljenja za stručne poslove u Stručnoj službi za poslove Gradskog vijeća Grada Sarajeva.

Jasmin Ademović, predsjedavajući Gradskog vijeća je otvorio sjednicu u 14.10 sati, pozdravio prisutne, te konstatovao kvorum za punovažan rad i odlučivanje.

Upoznao je članove Kolegija da je kašnjenje najavio član Kolegija Toni Vukadin, dok je član Kolegija Muamer Mekić upoznao članove Kolegija da je kašnjenje najavio i član Kolegija Seid Škaljić.

Na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, bez rasprave, **većinom glasova**, izjasnivši se sa **11 glasova „za“**, bez glasova „protiv“ i **jednim „suzdržanim“ glasom je usvojio** Zapisnik o radu 62. sjednice Kolegija Gradskog vijeća, održane 29.10.2024. godine.



Na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, bez rasprave, **jednoglasno, je usvojio** dnevni red 63. sjednice Kolegija Gradskog vijeća, tako da glasi:

1. Upoznavanje sa Odlukom o potvrđivanju i objavljivanju rezultata Lokalnih izbora u Bosni i Hercegovini 2024. godine
2. Priprema za održavanje 45. sjednice Gradskog vijeća Grada Sarajeva
3. Tekuća pitanja (prilog)

Ad 1)

Upoznavanje sa Odlukom o potvrđivanju i objavljivanju rezultata Lokalnih izbora u Bosni i Hercegovini 2024. godine

U uvodnim napomenama, **Jasmin Ademović, predsjedavajući Gradskog vijeća** je upoznao članove Kolegija da je Centralna izborna komisija Bosne i Hercegovine na svojoj 100. sjednici održanoj 05.11.2024. godine donijela Odluku o potvrđivanju i objavljivanju rezultata lokalnih izbora u Bosni i Hercegovini 2024. godine, da je Odluka objavljena u „Službenom glasniku BiH“ broj 75/24, te da su, ovom odlukom, između ostalih, potvrđeni i rezultati izbora za načelnika Općine Novo Sarajevo za što se na izborima kandidovala Benjamina Karić i dobila povjerenje građana.

Naglasio je da je u Odluci navedeno da Odluka stupa na snagu danom donošenja, a da će biti objavljena u službenim glasilima i na internet stranici Centralne izborne Komisije te da, u skladu s **Izbornim Zakonom Bosne i Hercegovine (član 1.10)**, **gradonačelnici Grada Sarajeva Benjamine Karić, prestaje mandat gradonačelnice Grada Sarajeva danom stupanja na snagu ove odluke, u skladu sa Zakonom.**

Jasmin Ademović, predsjedavajući Gradskog vijeća je upoznao članove Kolegija da će Odluku CIK-a proslijediti **Mandatno-imunitetskoj komisiji da pripremi i uputi Gradskom vijeću na razmatranje Informaciju o prestaku mandata gradonačelnice Grada Sarajeva Benjamine Karić.**

Također je naveo da, u skladu s Izbornim zakonom BiH, po isteku roka za podnošenje apelacije Sudu BiH na navedenu odluku, ukoliko ne bude žalbi, ta odluka postaje pravosnažna.

S tim u vezi, prestankom mandata gradonačelnice Grada Sarajeva Benjamine Karić, Grad Sarajevo ostaje bez izvršne vlasti.

Zatim je upoznao članove Kolegija da Statutom Grada Sarajeva nije predviđen slučaj kada gradonačelniku prestaje mandat po sili zakona, a prije isteka mandata, i to zbog izbora na mjesto načelnika gradske općine na lokalnim izborima.

Međutim, u članu 43. stav 11. Statuta Grada Sarajeva je propisana obaveza izbora novog gradonačelnika kada mjesto gradonačelnika ostane upražnjeno.

„(11) Ukoliko mjesto gradonačelnika ostane upražnjeno, Gradsko vijeće će izabrati novog gradonačelnika u roku od 30 dana.“

Također je podsjetio da je u Statutu Grada Sarajeva, u članu 44. stav 5. između ostalog, propisano:

„(5) U slučaju razrješenja gradonačelnika, Gradsko vijeće odlučuje o tome koji od zamjenika gradonačelnika vrši dužnost gradonačelnika do izbora novog.“

Jasmin Ademović, predsjedavajući Gradskog vijeća je rekao da se ovaj administrativni instrument koji u situaciji u kojoj sada jesmo, može primijeniti da bi se osigurala funkcija izvršne vlasti te se tako osigurava da Grad Sarajevo što kraće bude bez izvršnog organa i da funkcionira u punom kapacitetu do izbora gradonačelnika.

S tim u vezi, **Administrativna komisija Gradskog vijeća bi bila formalni predlagač odluke kojom bi Gradsko vijeće dalo ovlaštenje jednom od zamjenika gradonačelnika da vrši dužnost gradonačelnika do izbora gradonačelnika.**

Naglasio je da bi se analogno koristio postupak koji se primjenjuje i u drugim slučajevima, pa bi Kolegij Gradskog vijeća danas trebao predložiti Administrativnoj komisiji ime zamjenika gradonačelnika kojem bi se dalo ovlaštenje da vrši dužnost gradonačelnika, do izbor gradonačelnika. Ovaj prijedlog Kolegija, Administrativna komisija bi uvrstila u prijedlog odluke za Gradsko vijeće.

Također je naglasio da je potrebno imati na umu da će taj ovlaštenik u punom kapacitetu mijenjati gradonačelnika do izbora gradonačelnika, pa tako i davati ovlaštenje drugom zamjeniku da ga mijenja u odsustvu te da oba zamjenika trebaju biti spremna za funkciju izvršnog organa Grada Sarajeva, ovisno o situaciji, do izbor gradonačelnika.

Zatim je **Jasmin Ademović, predsjedavajući Gradskog vijeća** otvorio raspravu.

U raspravi su učestvovali članovi Kolegija: **Vedran Dodik, Vedad Deljković, Alen Girt, Srđan Srđić, predsjedavajući Gradskog vijeća Jasmin Ademović, Mila Eminović, sekretar Gradskog vijeća i Aida Bajramović, sekretarka organa uprave.**

Član Kolegija Vedad Deljković je, u diskusiji, predložio da Samir Avdić, zamjenik gradonačelnice Grada Sarajeva, vrši dužnost gradonačelnika do izbora gradonačelnika.

Aida Bajramović, sekretarka organa uprave je, u diskusiji, upoznala članove Kolegija da će Gradonačelnica prihvatiti mandat načelnice Općine Novo Sarajevo u proceduri, u skladu sa zakonom.

Mila Eminović, sekretar Gradskog vijeća zatražila je da njena diskusija uđe u Zapisnik te je rekla sljedeće:

„U svojstvu Sekretara Gradskog vijeća s ciljem zaštite zakonitosti i integriteta državne službe i mene kao državnog službenik želim da informišem Kolegij Gradskog vijeća da kao Sekretar Gradskog vijeća nisam bila ni na koji način konsultovana, upoznata i uključena u pogledu procedure izbora vršioca dužnosti gradonačelnika koju je upravo iznio Predsjedavajući Gradskog vijeća te sam mišljenja da predložena procedura i način izbora vršioca dužnosti gradonačelnika nije u skladu sa odredbama Statuta Grada Sarajeva i Poslovnika Gradskog vijeća Grada Sarajeva.“

Članovi Kolegija Toni Vukadin i Seid Škaljić su pristupili sjednici Kolegija u 14.30 sati.

U nastavku rasprave učestvovali su članovi Kolegija: **Vedran Dodik, zamjenica predsjedavajućeg Gradskog vijeća Mirela Džehverović, Mila Eminović, sekretar Gradskog vijeća, predsjedavajući Gradskog vijeća Jasmin Ademović, Srđan Srđić i Drago Jurić.**

Nakon rasprave, na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, većinom glasova, izjasnivši se sa **11 glasova „za“, bez glasova „protiv“ i tri „suzdržana“ glasa je usvojio** sljedeći **zaključak**:

Kolegij Gradskog vijeća upućuje prijedlog Administrativnoj komisiji da utvrdi Prijedlog Odluke o vršiocu dužnosti gradonačelnika Grada Sarajeva tako da predloži Gradskom vijeću Grada Sarajeva da Samir Avdić, zamjenik gradonačelnice Grada Sarajeva, vrši dužnost gradonačelnika do izbora gradonačelnika i uputi ga Gradskom vijeću na razmatranje i usvajanje.

Ad 2)

Priprema za održavanje 45. sjednice Gradskog vijeća Grada Sarajeva

U uvodnim napomenama, **Jasmin Ademović, predsjedavajući Gradskog vijeća** je podsjetio članove Kolegija da se, u skladu sa zaključcima sa 62. sjednice Kolegija Gradskog vijeća Grada Sarajeva, odvijaju pripreme za održavanje 45. sjednice Gradskog vijeća te da su u Gradskom vijeću, do održavanje sjednice Kolegija, primljeni i upućeni na razmatranje radnim tijelima sljedeći akti:

- Prijedlog Odluke o usvajanju Akcionog plana rodne ravnopravnosti Grada Sarajeva za period 2025.-2028. godina
- Prijedlog Odluke o izmjenama Odluke o načinu korištenja, održavanja i čuvanja uređenih vodotoka na području Grada Sarajeva
- Prijedlog Odluke o stavljanju van snage Odluke o stavljanju van snage Odluke o izmjenama i dopunama Odluke o pristupanju izradi RP „Centar Novo Sarajevo“
- Izvještaj o izvršenju Budžeta Grada Sarajeva za III kvartal 2024. godine
- Zaključak o javnoj raspravi sa Nacrtom Programa rada Gradskog vijeća Grada Sarajeva za 2025. godnu
- Zaključak o javnoj raspravi sa Nacrtom Budžeta Grada Sarajeva sa Nacrtom Odluke o izvršavanju Budžeta Grada Sarajeva za 2025. godinu
- Zaključak o javnoj raspravi sa Nacrtom Programa međunarodne saradnje Grada Sarajeva za 2025. godinu
- Zaključak o javnoj raspravi o Nacrtu Regulacionog plana Marijin dvor - Kvadrant C
- Informacija o saradnji i odnosima Grada Sarajeva sa nacionalnim manjinama
- Informacija o realizaciji budžetskih sredstava organizacijama humanitarnog karaktera

Također je upoznao članove Kolegija da je Komisiji za spomenike upućen Prijedlog Odluke o usvajanju sadržaja teksta Spomen-obilježja civilnim žrtvama zločina opsade Sarajeva 1992-1996 obzirom da je Komisija ovlašteni predlagač.

Podsjetio je da ako Mandatno-imunitetska komisija utvrdi Inforamciju o Odluci CiK-a BiH o potvrđivanju i objavi rezultata loklanih izbora 2024. godine i ovaj materijal će bit uvršten u prijedlog dnevnog red 45. sjednice Gradskog vijeća kao i Prijedlog Odluke o vršiocu dužnosti gradonačelnika Grada Sarajeva ukoliko Administrativna komisija utvrdi navedeni prijedlog odluke.

Termin održavanja sjednice i dinamika aktivnosti u pripremi sjednice Gradskog vijeća

Jasmin Ademović, predsjedavajući Gradskog vijeća podsjetio je članove Kolegija da je na 62. sjednici Kolegija Gradskog vijeća usvojen sljedeći zaključak:

- 45. sjednica Gradskog vijeća će se, u skladu sa okvirnom dinamikom, održati **u srijedu 27.11.2024. godine u Vijećnici** sa početkom **u 10.00 sati**;
- Predlagači će materijale dostaviti Predsjedavajućem, najkasnije, **u utorak 05.11.2024. godine**;
- Sjednice radnih tijela, u pripremi 45. sjednice Gradskog vijeća, održat će se u sedmici koja počinje sa **ponedjeljkom 11.11.2024. godine**;
- Pozivi gradskim vijećnicima za 45. sjednicu Gradskog vijeća će se uputiti u **srijedu 20.11.2024. godine**.

Predložio je, a imajući u vidu situaciju da je potrebno što prije održati sjednicu Gradskog vijeća na kojoj bi Gradsko vijeće dalo ovlaštenje jednom od zamjenika Gradonačelnice, da se poziv za 45. sjednicu Gradskog vijeća uputi, najkasnije do četvrtka ove sedmice (14.11.2024. godine, a da se 45. sjednica održi u utorak 19.11.) dok bi se izvještaji sa radnih tijela, koja se ne održe do upućivanja poziva, naknadno dodali, uz poziv za sjednicu.

Na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, bez rasprave, **jednoglasno, je usvojio** sljedeći zaključak:

- 45. sjednica Gradskog vijeća će se održati **u utorak 19.11.2024. godine u Vijećnici** sa početkom **u 10.00 sati**.
- Pozivi gradskim vijećnicima za 45. sjednicu Gradskog vijeća će se uputiti **u četvrtak 14.11.2024. godine**.
- Izvještaji radnih tijela koja se ne održe do upućivanja poziva će biti naknadno dodani uz poziv za sjednicu.

Ad 3)

Tekuća pitanja

I. Jasmin Ademović, predsjedavajući Gradskog vijeća je upoznao članove Kolegija da je uz poziv za 63. sjednicu Kolegija dostavljen akt Ureda za borbu protiv korupcije Kantona Sarajevo broj:20-45-189-88/24 A.A od 22.10.2024. godine koji se odnosi na nespojivosti, ograničenja i zabranjene aktivnosti u vršenju javnih funkcija, a u kojem je Sekretaru Gradskog vijeća upućena molba da sa dostavljenim aktom upozna sve vijećnike u Gradskom vijeću Grada Sarajeva.

Jasmin Ademović, predsjedavajući Gradskog vijeća je istakao da je potrebno da članovi Kolegija akt prosljede članovima klubova gradskih vijećnika i članovima radnih tijela koji predstavljaju klubove u radnim tijelima Gradskog vijeća.

II. Jasmin Ademović, predsjedavajući Gradskog vijeća je podsjetio da su u formi informativnih materijala dostavljeni:

- Akt Ministarstva privrede Kantona Sarajevo broj: 07-06-21-40958/24 od 19.09.2024. godine - dostava Prijedloga za izradu Nacrta Programa rada Gradskog vijeća Grada Sarajeva za 2025. godinu,
- Akt Općine Stari Grad Sarajevo broj: 01-04-4-2809/24 od 04.10.2024. godine - prijedlozi za izradu Nacrta Programa rada Gradskog vijeća Grada Sarajeva,
- Akt Udruženja likovnih umjetnika primjenjenih umjetnosti i dizajnera u Bosni i Hercegovini - ULUPUuBiH od 29.10.2024. godine koji se odnosi na Zahtjev za sticanje statusa udruženja od posebnog značaja za Grad Sarajevo.

Jasmin Ademović, predsjedavajući Gradskog vijeća je predložio, a članovi Kolegija se saglasili da se svi navedeni akti dostave Gradskoj upravi na dalje postupanje.

Obzirom da pod ovom tačkom dnevnog reda nije bilo novih prijedloga za raspravu, **Jasmin Ademović, predsjedavajući Gradskog vijeća** je zaključio sjednicu Kolegija Gradskog vijeća u 14.42 sati.

SEKRETAR GRADSKOG VIJEĆA

Mila Eminović, s.r.

PREDSJEDAVAJUĆI GRADSKOG VIJEĆA

Jasmin Ademović, s.r.